


曹杜洛北學

州丹陽墅園

杜榮杜抱

丹辱丹食雜

譜志記錄疏



成集書叢


編初

者編主
五雲王

行發館書印務商



學圃雜疏



王世懋著

本館據寶顏堂叢
書本排印初編各
叢書僅有此本

083

114

2:1355

學園雜誌 自敘

自敘

余性多嗜好，亦多諳解。然幸無一事足累此心者。晚來以澹爲宗，欲一切掃去。獨愛種奇花，常命兒子。吾晚境無所須，汝輩但爲我羅致。四時花於園中，令膽瓶內日供一枝足矣。元馭閣老性醇直，無他好，獨此癖與予同。近貼書云：旦夕圖歸，爲我先致蓮香白家園中以待。余亦多病思歸，暇日輒憶花品應致者，及已致而宜愛護者，錄之以示騶騷二子。病後禁思，作此事弄筆自娛耳。毋謂我髮種種尙作兒態也。

萬曆丁亥春日損齋道人王世懋書

51595

學圃雜疏

花疏

太倉 麟洲 王


南中梅都於臘月前便開。吾地稍遲。紅梅最先發。元日有開者。此花故當首植。性多蟲。中有深淺二種。可致其淺者。次則杭之玉牒。本地之綠萼爲佳。曾於京師許千戶家見。梅之極品。不知種在何處。當詢而覓之。予養園中一綠萼梅。偃蓋婆娑。下可坐數十人。今特作高樓賞之。子孫當加意培壅。若野梅可置竹林水際。鵝頂梅種園中取菓。不足登几案也。

迎春花雖草本。最先點綴春色。亦不可廢。余一盆景。結屈老榦。天然得之嘉定唐少谷。人以爲寶。

一莖一花者。曰蘭。宜興山中特多。南京杭州俱有。雖不足貴。香自可愛。宜多植盆中。今人絕重建蘭。卻只是蕙。見古人畫蘭。殊不爾。虎丘戈生曾致一盆。葉稀而長。稍粗於興蘭。出數莖。正春初開花。特大於常蘭。香亦倍之。經月不凋。酷似馬遠所畫。戈云得之他方。今尙活。時花廣求此。以備春蘭之絕品。

玉蘭早於辛夷。故宋人名以迎春。今廣中尙仍此名。千榦萬莖。不葉而花。當其盛時。可稱玉樹。樹有極大者。籠蓋一庭。然樹大則花漸小。不可不知。余童時猶見人珍重。今不然矣。

吾地山茶重寶珠。有一種花大而心繁者。以蜀茶稱。然其色類般紅。嘗聞人言滇中絕勝。余官莆中。見士



大夫家皆種蜀茶花數千朵。色鮮紅作密瓣。其大如盆。云種自林中丞蜀中得來。性特畏寒。又不喜盆栽。余得一株。長七八尺。昇歸植澹圃中。作屋幕於隆冬。春時拆去。葢多輒摘卻。僅留二三花更大。絕爲余兄所賞。後當過枝。廣傳其種。亦花中寶也。

海棠品類甚多。曰垂絲。曰西府。曰棠梨。曰木瓜。曰貼梗。就中西府最佳。而西府之名紫綿者尤佳。以其色重而瓣多也。此花特盛於南都。余所見徐氏西園樹皆參天。花時至不見葉。西園木瓜尤異。定是土產所宜耳。垂絲以櫻桃木接。開久甚可厭。第最先花。與玉蘭同時植之。傍掩映不可廢也。貼梗草本。郡城中種之極高大。當訪求種法。以備一種。紫綿宋小說茗溪漁隱叢話備載之。

杏花無奇。多種成林則佳。城中朱氏園中百株。偃仰水旁。余嘗攜榼賞之。今當於廣園荒池別置一林。桃花種最多。若金桃蜜桃灰桃之類。多植園中取果。其可供玩者莫如碧桃人面桃二種。緋桃乏韻。卽不種亦可也。壽星桃矮而花能結大桃。亦奇可玩。桃殊不中食。

余性雅愛梨花之類。而微恨其氣不可嗅。吾地酷少此種。溶溶院落。何可無此君。終當致之。紫荆郁李繡毬皆非奇卉。然是點綴春光者。亦是難廢。下至金雀錦帶棣棠剪春羅。雖瑣瑣彌甚。園中安可無一繡毬。亦無足取。初見閩人來賣一花。云是紅繡毬。倭國中來者。余後至建寧。見縉紳家庭中花簇紅毬。儼如剪綵。名曰山丹。乃知是閩卉也。此種亦堪置庭中。

牡丹本出中州。江陰人能以芍藥根接之。今遂繁滋。百種幻出。余澹圃中絕盛。遂冠一州。其中如綠蝴蝶

大紅獅頭舞青霓尺素最難得開。南都牡丹讓江陰。獨西瓜瓢爲絕品。余亦致之矣。後當於中州購得黃樓子。一生便無餘憾。人言牡丹性瘦不喜糞。又言夏時宜頻澆水。亦殊不然。余圃中亦用糞乃佳。又中州土燥。故宜澆水。吾地溼安可頻澆。大都此物宜於沙土耳。南都人言分牡丹種時。須直其根。屈之則死。深其坑以竹虛插。培土後拔去之。此種法宜知。

余以牡丹天香國色。而不能無綵雲易散之恨。因復剏一亭。周遭悉種芍藥。名其亭曰續芳。芍藥本出揚州。故南都極佳。一種蓮香白。初淡紅。後純白。香獨如蓮花。故以名。其性尤喜糞。予課僮澆之。其大反勝於南都。卽元馭所愛也。其他如墨紫。硃砂紅之類。皆妙甚。已致數種。歸開時。客皆蟻集。真堪續芳矣。

玫瑰非奇卉也。然色媚而香甚旖旎。可食。可佩。園林中宜多種。又有紅黃刺梅二種。絕似玫瑰而無香。色瓣勝之。黃者出京師。蔓花。五色薔薇俱可種。而黃薔薇爲最貴。易蕃亦易敗。余圃中特盛。木香惟紫心小白者爲佳。圃中亦有架。宋人絕重茶蘼香。今竟不知何物。疑卽是白木香耳。今所謂茶蘼白而不香。定非宋人所珍也。

花之紅者杜鵑。葉細花小。色鮮瓣密者曰石岩。皆結數重臺。自浙而至。頗難畜。餘于安仁間徧山如火。卽山躑躅也。吾地以無貴耳。渥丹草種也。有散丹。有捲丹。然詩人稱之。最爲近古。宜畜芍藥之後。鸞粟花最繁華。其物能變。加意澆植。妍好千態。曾有作黃色綠色者。遠視佳甚。近頗不堪。聞其粟可爲腐澀精物也。又有一種小者曰虞美人。又名滿園春。千葉者佳。

蜀葵五色千葉者佳。性亦能變。黑者如墨。藍者如靛。大都鶯粟類也。廣庭中離落下無所不宜。護草忘憂。其花堪食。又有一種小而純黃者曰金萱。甚香而可食。尤宜植於石畔。石竹雖野花。厚培之能作重臺異態。他如夜落金錢。鳳仙花之類。俱離落間物也。

草花多種。最惡者虎斑百合。蛺蝶花。金系芋。園亭間決不可植。故不如高良姜。白蟻。尤堪入畫。偶種一兩株亦得。百合中名麝香者。人謂卽夜合。花根甜可食。宜多種圃中間。取佳者爲盆供。宜與山中最多人。取其根餽客。香不如家園所種。蔓陀羅花香狀略同。採食能令人發狂。

夾竹桃與五色佛桑俱。是嶺南北來貨。夾竹桃花不甚佳。而堪久藏。佛桑卽謹護必無存者。茉莉花百中一二可活。然終不能盛花。大抵只宜供一歲之玩。佛桑間買一二株。茉莉三五株。花事過卽爲朽株矣。木槿賤物也。然有大紅千葉者。有白千葉者。二種可亞佛桑。宜覓種之。

建蘭盛於五月。其物畏風畏寒畏鼠畏蠅。其根甜爲蟻所逐。養者常以水壺隔不令得緣入。余作一屋於竹林南。外施兩重草席。坎地令稍深。貯蘭於其上。無風有好日。開門暴之。所畜二三十盆。無不盛花者。其種亦多。玉魷爲第一。白榦而花上出者是也。次四季。次金。名曰蘭。其實皆蕙也。閩產爲佳。贛州蘭葉不長勁。價當減半。

石榴本在外國來者。然獨京師爲勝。中貴盆中有植榦數十年。高不盈二尺。而垂實纍纍至巨者。皮子之紅白一隨其花。花而不實者曰餅子。深紅淡紅二種皆山亭之珍也。吾地不宜盆中。移歸不二年壞矣。本

地餅子紅榴稍佳而樹大非几案前物。單葉有黃白淺深紅四種。存以標異可也。

素馨出閩。黃者不甚香。亦間攜至吾地。白者香勝於茉莉。即彼中亦未之見。閩中又有素蘭。賽蘭二種。賽蘭一名珍珠蘭。即廣人以爲蘭香者。亦曾移植吾地。多不能生。

紫薇有四種。紅紫淡紅白。紫卻是正色。閩花物勝蘇杭。獨紫薇作淡紅色最醜。本野花種也。白薇近來有之。示異可耳。殊無足貴。臭梧桐者吾地野生。花色淡。人無植之者。淮揚間成大樹。花微者縉紳家植之。中庭。或云後庭花也。獨閩中此花紅鮮異常。能開百日。亦名百日紅。花作長鬚。亦與吾地臭梧桐不同。園林中植之。灼灼出矮牆上。至生深澗中。清泉白石。斐臺奪目。每欲攜子歸種。種未得。後當問閩人取種。永嘉人謂之丁香花。

蓮花種最多。唯蘇州府學前種葉如傘蓋。莖長丈許。花大而紅。結房曰百子蓮。此最宜種大池中。舊又見黃白二種。黃名佳。卻微淡黃耳。千葉白蓮亦未爲奇。有一種碧臺蓮。大佳。花白而瓣上恆滴一翠點。房之上復抽綠葉。似花非花。余嘗種之。摘取瓶中。以爲西方品。近於南都李鴻臚所復得一種。曰錦邊蓮。蒂綠花白。作莖時綠苞已微界一線紅矣。開時千葉。每葉俱以胭脂染邊。真奇種也。余將以配碧臺蓮。竚二池對種。亦可置大綱中。爲無前之玩。若所謂並頭品。字四面觀音。名愈奇。愈不足觀。切勿種。

山礬一名海桐樹。娑娑可觀。花碎白而香。宋人灰其葉。造黝紫色。今人不知也。以山谷詩。遂得兄梅幸矣。柑橘花皆清香。而香櫟花尤酷烈。甚於山礬。結實大而香。山亭前及廳事兩墀皆可植。

梔子佛經名簾蔔。單瓣者六出。其子可入藥入染。重瓣者花大而白。差可觀。香氣殊不雅。以佛所重存之。凌霄花蔓生。纏奇石老樹。作花可觀。然聞能墮胎。婦人不可採。大都與春時紫籐皆園林中不可少者。玉簪一名白鶴花。宜叢種。紫者名紫鶴。無香。可刈也。

剪秋羅色正紅。聲價稍重於剪春羅。然當盛夏已開矣。秋葵雞冠。老少年秋海棠。皆點綴秋容。草花之佳者。雞冠須矮脚者。種磚石砌中。其狀有掌片。毬子。纓絡。其色有紫黃白。無所不可。老少年別種有秋黃十樣錦。須雜植之。真如錦織成矣。就中秋海棠尤嬌好。宜於幽砌北窗下種之。傍以古拙一峯。菖蒲翠筠。草皆其益友也。

木樨吾地爲盛。天香無比。然須種早黃。毬子二種。不惟早黃。七月中開。毬子花密爲勝。卽香亦馥郁異常。丹桂香減矣。以色稍存之餘。皆勿植。又有一種四季開花而結實者。此真桂也。閩中最多。常以春中盛開。吾地亦間有之。宜植以備一種。

芙蓉特宜水際。種類不同。先後開。故當雜植之。大紅最貴。最先開。次紅淺紅常種也。白最後開。有曰三醉者。一日間凡三換色。亦奇。客言曾見有黃者。果爾當購之。芙蓉入江西俱成大樹。人從樓上觀。吾地如榛荆狀。故須三年一斫卻。

菊至江陰上海吾州。而變態極矣。有長丈許者。有大如盃者。有作異色二色者。而皆名粗種。其最貴乃各色剪絨。各色攢。各色西施。各色狼牙。乃謂之細種。種之最難。須得地得人。燥溼以時。蟲蠹日去。花須少而

大葉須密而鮮。不爾便非上乘。元馭閣老尤愛種菊。京師有一種大紅曰麻葉紅。曰相袍紅。元馭爲翰林時。特命囊之馬首歸。今吾地尙有此種。然開不能大佳。想亦地氣使然。菊中有黃白報君。知最先開。甘菊可作湯。寒菊可入冬。皆賤種也。而皆不可廢。又有一種五九月開。亦異種也。

秋花多可人。獨秋牡丹爲下品。宜勿種。

黃山茶。白山茶。紅白茶。梅皆九月開。二山茶花大而多韻。亦茶中之貴品。楊妃山茶稍後。與白菱同時開。楊妃是淡紅。殊不能佳。爲是冬初花。當具一種耳。白菱花純白而雅。且開久而繁。人云來自閩中。余在閩間之。乃無此種。始在豫章得之。定是嶺南花也。花至季冬始盡。性亦畏寒。花後宜藏室中。

蠟梅是寒花絕品。人言臘時開。故以蠟名。非也。爲色正似黃蠟耳。出自河南者曰磬口。香。色。形皆第一。松江名荷花者次之。本地狗纓下矣。得磬口荷花可廢。何況狗纓。

凡花重臺者爲貴。水仙以單瓣者爲貴。出嘉定。短葉高花。最佳種也。宜置瓶中。其物得水則不枯。故曰水仙。稱其名矣。前接蠟梅。後迎江梅。真歲寒友也。

花之四季開者。蘭桂而外。有月桂。長春菊。即金蓮花。月桂閩種爲佳。

芭蕉。惟福州美人蕉最可愛。歷冬春不凋。常吐朱蓮如簇。吾地種之能生。然不花無益也。又有一種名金蓮寶相。不知所從來。葉尖小如美人蕉。種之三四歲。或七八歲始一花。南都戶部五顯廟各有一株。同時作花。觀者雲集。其花作黃紅色。而瓣大於蓮。故以名。至有圖之者。然余童時見伯父山園有此種。不甚異。

也。此卻可種。以待開時賞之。若甘露則無種。蕉之老者輒生。在泉漳間則爲蕉實耳。

吾地人最重虎刺。杭州者不佳。不如本山。其物最喜陰。難種。然吾所愛者天竹。纍纍朱實。扶搖綠葉上。雪中視之尤佳。余所在種之。虎刺之下。旱珊瑚盆中可種。水珊瑚最易生。亂植竹林中亦佳。蔓生者曰雪裏珊瑚。不足植也。

菖蒲以九節爲寶。以虎鬚爲美。江西種爲貴。本性極愛陰。清明後則剪之。冬則以網覆之。不惟明目。兼助幽人之致。余嘗過武當山青羊澗。見幽勝處。輒生泉石上。真有仙氣。宜多畜之。

福州有鐵蕉。贛州有鳳尾蕉。似同類而稍異狀。然好以鐵爲糞。將枯釘其根。則復生。亦異物也。云能辟火。園林中存一二株亦可。翠筠草極陰處種之。色翠甚可愛。尤宜與秋海棠作伴。

木則天目松。栝子松。千頭柏。纓絡柏。金線柳。皆佳品也。次則丹楓。石楠。梧桐。黃楊。西湖柳。烏絨樹。北人謂之馬櫻花。皆可植於水次。果則櫻桃。李。枇杷。橘。栗。葡萄。皆可種也。以供盤飮。予所錄次者在花。故草木之類從略。

竹是吾家子猷所好。園中自當日有其種類。當別有記。

果疏

百果中櫻桃最先熟。卽古所謂含桃也。吾地有尖圓大小二種。俗呼小而尖者爲櫻珠。旣吾土所宜。又萬顆丹的。掩映綠葉可玩。澹圃中首當多植。

梅種殊多。旣花之後青而如荳。可食者曰消梅。脆梅。綠萼梅。消梅最佳。以其入口卽消也。熟而可食者曰

鶴頂梅。且霜梅梅醬。梅供一歲之咀嚼。園林中不可少。

杏花江南雖多。實味大不如北。其樹易成。實易給。林中摘食可佳。枇杷出東洞庭大。自種者小。然卻有風味。獨核者佳。蓋他果須接乃生。獨此果直種之亦能生也。

楊梅須山土。吾地沙土非宜。種之亦能生。但小耳。樹極婆娑可愛。今當種澹圃高岡上。與山礬相覆蔭。

李種亦殊多。北土盤山麝香紅妙甚。江南絕無。然亦有一種極大而紅者。味可亞之。亦有王黃青翠嘉慶子。俱稱佳品。吾圃中僅有粉李一種。餘當致之。

桃有金桃銀桃水蜜桃灰桃匾桃。澹圃中已備金蜜二種。皆佳品也。

梨如哀家梨金華紫花梨。不可見也。今北之秋白梨南之宣州梨。皆吾地所不能及也。聞西洞庭有一種佳者。將熟時以箸就樹包之。味不下宣州。當覓此種植之。亦一快也。

花紅一名林禽。卽古來禽也。郡城中多植之。覓利。味苦非佳。而特可觀。北土之蘋婆。卽此種之變也。吾地素無。近亦有移植之者。載北土以來。亦能花能果。形味俱減。然猶是奇物。王相公及政僮園俱有之。二種雖貴賤難易迥別。吾圃中各植三兩株足矣。來禽種雖易。然與桃性俱多蟲而易敗。種者苦於剔蟲。若桃則數年一易可耳。

核桃北果。而宜山種。吾地絕少。然亦可種。

葡萄雖稱涼州。江南種亦自佳。有紫水晶二種。宜於水邊設架。一年可生。纍垂可玩。不但以供餽飮也。

吾地棗不能佳。第擇其紅色者種一株。以當摘鮮亦得。

安石榴無如京師。致之南方多死。卽生多化爲叢狀。不若求富陽種種之。須實大子綻。卽不甘亦足供玩。柿種多。吾地特宜。若海門柿。罐柿。無核火珠柿。皆甘冷可食。宜植牆隙。

柑橘產於洞庭。然終不如浙溫之乳柑。閩漳之朱橘。有一種紅而大者。云傳種自閩。而香味徑庭矣。余家東海上。又不如洞庭之宜橘。乃十產蛻花甜蜜橘二種。卻不啻勝之。金橘牛乳者。易生而品下。圓者甘香。然亦家園種者佳。第橘性畏寒。值冬霜雪稍盛。輒死。植地須北蕃多竹。霜時以草裹之。又虞春枝不發。記兒時種橘不然。豈地氣有變也。

香櫞花香實大。雖酸澁齒。以爲湯則大佳。置實盤中。盈室俱香。實佳品也。閩中乃無之。而以佛手柑名。近聞洞庭人亦有種而生者。吾圃中尤不易植也。

栗山果也。植之平地亦生。懸殼如蠟。亦堪備一種佳實。

銀杏樹有大合抱而不實。人言樹有雌雄。聞亦有法治之則生。樹長大。秋冬葉純黃。間楓林中。相錯如繡。此植圃中岡上。卽不實可也。

栝子松俗名剔牙松。歲久亦生實。雖小亦甘香可食。南京徐氏西園一株。是元時物。秀色參天。目中第一。山東有文官果。花亦可觀。形味稍似馬金囊。禮部精膳司亦有一株。不知可移植吾地否。若無花果不獨京師。卽吾地種輒生。但惡不足爲園林重耳。

蔬疏附水草

韭最獲利。且宜吾地。冬盡春初。韭黃真佳味。但吾奉道不食耳。

芥多種。以春不老爲第一。北京爲上。南京次之。吾地不逮也。芥之有根者。想卽蔓菁。京師大而脆。爲蔬中佳味。攜子歸種之。城北而能生尙小。已竟如之。然移植他所。輒不如初。謂是北種。比入閩則其地徧生。然蔓菁菜云是諸葛武侯所種是也。

古人食菜必曰葵。王右丞清齋折露葵是也。乃今菜品竟無稱葵。不知何菜當之。又所重曰秋末晚菘。亦竟無定說。卽爾雅翼亦難憑也。大都今之東菜。如郡城箭桿菜之類。皆可稱菘。箭桿雖佳。然終不敵燕地黃芽菜。可名菜中神品。其種亦可傳。但彼中經冰霜以籊廬覆之。葉脫色改黃而後成。此卻不宜耳。

鹽菜空中而味脆。獨南京有之。可以種盆中。攜歸取食。入地則不生。

魏文貞公好食芹。世以比曾皙之羊棗。然今南北兩京片皆長數尺。而味絕佳。何必文貞始嗜。蓋芹本水際野植。而獨兩京種之老圃。故佳。想取植之亦得爾耳。

萹苣絕盛於京口。鹹食脆美。卽旋摘烹之亦佳。

菠菜北名赤根。菜之凡品。然可與葶腐並烹。故園中不廢。若君蓬菜俗名甜菜者。菜斯爲下矣。

蘿蔔須長而白如雪。甜而消如梨者。乃稱絕品。南北兩京多圓而大。赤色雖佳。味殊不敵也。

胡蘿蔔獨常熟爲佳。然酷非余所須。若胡葵味苦無當。而在五葷之內。不植吾圃中可也。

葱蒜薤與韭雖俱五葷而爲人所常用。薤性稍平。江浙多有之。吾地少亦可不種。薯蕷本山中野植。與黃獨同類。故名山藥。然獨保定懷慶諸處爲佳。閩浙多作紅色。而味不甘糯。吾地種美惡在兩種間。亦不可廢。

芋古名蹲鴟。吾土最佳。有水旱紫白二種。旱者不可食。此地若種之得法有十斤者。

香芋落花生產嘉定。落花生尤甘。皆易生物可種也。甘露子如耳環。醬食之脆美。亦別方之產。吾地可種。莧有紅白二種。素食者便之。肉食者忌與鼈共食。一種野生及馬齒莧俱堪食。

百草中可食者最多。薺菜枸杞苗五加芽草中之美味。菊苗亦佳。大抵摘野蔬入饌尤覺趣耳。

藜蒿多生江岸。九江諸處採賣。以數百石舩裝之遠貨。吾地亦自不乏。

芡一名雞頭。果中之美味。而最補益人。然獨杭州多而佳。京師產者形如刺蝟而有粳糯。糯而大者味勝。杭產吾地俱不宜。然勤種之鮮摘亦勝。

菱卽芰也。而多種。有紅有綠。有深水有淺水。有角有腰。而產於郡城者曰哥窰蕩。產於崑山者曰婁縣。皆佳甚。須其種種之。

茭白以秋生。吳中一種春生曰呂公茭。以非時爲美。初出時煮食甜軟。據爾雅翼曰。茭卽菰蔣之類。曰菰首者。卽今之茭白也。又有黑縷如黑點者名烏鬚。今茭中有之。余所種僅秋生者耳。然菰實有米。而今茭白未聞有之。或者野茭乃生米也。

茨菰古曰鳧茨。種淺水中。夏月開白花。秋冬取根食。味亞於香芋。

荸薺。方言曰地栗。亦種淺水。吳中最盛。遠貨京師爲珍品。色紅嫩而甘者爲上。

蓮房之大者名百子蓮。藕則白蓮單瓣者乃生。高郵寶應第一。吳中亦佳。吾土僅供玩耳。尊以張陸所誇。遂爲吳中口實。然實不佳。且非池塘間物也。

蒲筍蘆筍皆佳味。而蒲筍尤佳。吾地人乃不知取食耳。然種蒲者多間取之。苦不成筍。豈其種別耶。

瓜疏

西瓜古無稱。云金主征西域得之。洪皓自燕中攜歸。然瓜中第一美味。而種徧天下。不勝晚出異方之物。乃爾。吾地以蔣福柵橋二處爲絕品。然家園中所種。色青白而作枕樣者便佳。不必蔣柵也。

甜瓜以香而小者爲第一。作黃綠二色。豈卽邵平所種五色子母瓜耶。今涼州塞外作乾條。遺遠人。味極甘。當是此種。若南瓜雖有奇狀殊色。僅堪煮食。酷無意味。而更與羊食忌。是可廢。

王瓜出燕京者最佳。其地人種之火室中。逼生花葉。二月初卽結小實。中官取以上供。唐人詩云。二月中旬已進瓜。不足爲奇矣。又一種秋生者亦佳。吾土俱宜。閩中二三月間食。入夏枯矣。

瓜之不堪生噉。而堪醬食者曰菜瓜。圓者如甜瓜。長者如王瓜。皆一類也。以甜醬漬之爲蔬中佳味。天下結實大者無若冬瓜。味雖不甚佳。而性溫可食。

絲瓜北種爲佳。以細長而嫩者爲美。性寒無毒。有云多食之能痿陽。北人時噉之。殊不爾。然用其蒂可治。

小兒痘汁滴瓶中。能消痰火。其涼可知矣。

吾地有名錦荔枝者。外作五色蜂窠之狀。內子如蠶蟲。人甚惡之。不知閩廣人以爲至寶。去實用其皮肉。煮肉味殊苦。廣人亦爲涼。多于京師種。摘而自供食。往在泉州。見城中遍地植之。名曰苦瓜。形稍長于此種耳。

匏子瓜類也。大而扁者可食。小而長作細腰者可翫。種類頗多。偶得佳者。不啻珍品。瓠子匏類也。形稍長。銳上豐下。味似勝之。唐鄭珣瑜所謂亦去毛爛黃熟拗折須此物也。

荳疏

荳之美者無如白匾豆。味甘而益人。種類殊多。龍瓜爲下。匾闊而甘糯者最勝。閩中四時不凋。方春卽食。然不如吾土之佳。郭道人遺二種。明春種之。

菽入五穀。非圃中物也。然有一種絕大而有青黑色者。味甘甚。可佐盤飧。余圃中以爲嘉蔬。蠶荳初熟。甘香。虎丘雨前茶。謂有荳子香是也。種自雲南來者。絕大而佳。可種。亦自有風味。

刀荳可醬食。性能殺蟲。可種也。

草決明。結實如小寒荳。北人名之曰望江南。烹茶作果味亦佳。西番麥形似稷。而枝葉奇大。結子纍纍。煮食之。味亞芡實。

薏苡仁。大補益人而易生。圃中隙地可種。按荳是五穀中之菽。而西番麥薏苡仁皆穀類。以圃中可植。故

得附焉。

竹疏

竹類最繁。其載在竹譜者。今不可盡憑矣。姑就耳目所親記者述之。竹其名而種絕不類者曰櫻竹。曰桃絲竹。產於交廣。質美色斑。可爲扇管者曰麋綠竹。曰湘妃竹。產於沅湘間。名高而實不稱。色亞二竹者曰雲根竹。產於西蜀。雜篁叢生。而筍味絕美。可上供者曰筍尖竹。產於武當山。大可爲椽爲器者曰貓竹。小而心實可編籬者曰籬竹。最小而美可爲箭者曰箭竹。皆產於諸山。吾地海濱無山。種不可致。其餘則吾圃中無所不備矣。

竹之小而美者曰紫竹。曰金竹。而金竹中尤美者曰黃金間碧玉。色澤殊常。中界一道綠。尤可愛。有一種大者曰碧玉間黃金。稍不逮。然與黃金竹相對。廢一不可。余圃中俱不乏。

斑竹。筍不中食。大而鮮澤者。色用可亞湘妃。亦佳竹也。

土竹之大者。無如筍竹。筍有二種。一曰護雞筍。大可視貓竹。而筍味佳。然絕無用。園林中供翫而已。次曰綿筍。小於護雞。而筍味尤佳。

諸筍皆初夏所生。而獨嘉定之燕來筍。既早而味絕佳。與新茶鬪勝。吾地尙堪種。郡城不可得。遠貽之以爲殊味。

竹之僅可爲籬者曰籬竹。

慈孝竹叢生。笋以冬生。皆在叢外。若護其母。故曰慈孝。江閩間皆以編籬。閩種尤極長大。閩竹無他佳者。大都此種也。

竹之最下者曰鳳尾。曰瀟湘。其最小而可置几案間者曰水竹。以上皆余園中所有。